



Jadual Pembacaan Khutbah Jumaat

Siri 8/ 2023

(Ogos Tahun 2023)

تاريخ	تاجوق	ب
4 Ogos 2023M/ 17 Muharram 1444H	Kepimpinan: Antara Taklif dan Tasyrif	1.
11 Ogos 2023M/ 24 Muharram 1444H	Istiqamah Berubah Ke Arah Kebaikan	2.
18 Ogos 2023M/ 1 Safar 1444H	Penjagaan Ikhtilat Di Tempat Kerja	3.
25 Ogos 2023M/ 8 Safar 1444H	Benarkah Kita Merdeka?	4.
Khutbah Kedua		

دبیایاء:



زكاة فولاو فينغ

دترییتکن:



جابتن حال إحوال اگام اسلام فولاو فينغ



Jawatankuasa Panel Semakan Teks Khutbah Negeri Pulau Pinang

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. Y.Bhg Dato' Rosli bin Othman**
Ahli Jawatankuasa Fatwa Negeri Pulau Pinang
- 3. Prof. Madya Dr. Atikullah bin Abdullah**
Pensyarah, Pusat Pengajian Ilmu Kemanusiaan,
Universiti Sains Malaysia
- 4. Ustaz Ahmad bin Hashim**
Ketua Pusat Pengajian Tahfiz Al-Quran,
Kolej Islam Teknologi Antarabangsa Pulau Pinang (KITAB)
- 5. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 6. Ustaz Mohd Salmi bin Shaimi**
Ahli Jawatankuasa Fatwa Negeri Pulau Pinang
- 7. Ustaz Subki bin Mohamed**
Mantan Pensyarah, IPG Kampus Tuanku Bainun
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)





Istiqamah Berubah Ke Arah Kebaikan

11 Ogos 2023M/ 24 Muharram 1444H

الْحَمْدُ لِلَّهِ الَّذِي وَعَدَ مَنْ اسْتَقَامَ عَلَى الصِّرَاطِ ثَوَابًا عَظِيمًا، وَتَوَعَّدَ مَنْ حَادَ عَنْهُ
بِأَنَّ لَهُ عَذَابًا أَلِيمًا،

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَكَفَى بِاللَّهِ نَاصِرًا وَمُعِينًا،

وَأَشْهَدُ أَنَّ مُحَمَّدًا عَبْدُهُ وَرَسُولُهُ كَانَ بِالْمُؤْمِنِينَ رَؤُوفًا رَحِيمًا.

صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ صَلَوةً وَسَلَامًا عَظِيمًا.

أَمَّا بَعْدُ ؛ عِبَادَ اللَّهِ، اتَّقُوا اللَّهَ، فَإِنَّ مَنْ اتَّقَى اللَّهَ وَقَاهُ، وَأَرْشَدَهُ إِلَى خَيْرِ دِينِهِ وَدُنْيَاهُ.

PARA TETAMU JUMAAT YANG DIKASIHI SEKALIAN,

Khatib ingin menyeru untuk kita bersama-sama meningkatkan ketakwaan kepada Allah dengan mentaati segala arahan Allah dan meninggalkan perkara-perkara yang ditegah oleh-Nya. Sahutlah seruan ini agar kita beroleh kejayaan di dunia dan di akhirat.

Selain itu, khatib juga ingin mengingatkan sidang hadirin sekalian agar memberi fokus dan mendengar dengan bersungguh-sungguh khutbah Jumaat ini. Janganlah leka bermain gajet, tidur dengan sengaja, berbual-



bual atau menggerakkan tabung kutipan masjid kerana perbuatan-perbuatan tersebut bertentangan dengan adab mendengar khutbah. Marilah kita telusuri bersama khutbah Jumaat yang akan mengangkat tajuk **“Istiqamah Berubah Ke Arah Kebaikkan.”**

SIDANG JUMAAT YANG DIHORMATI SEKALIAN,

Saban tahun apabila tibanya tahun baharu hijrah, kita akan diingatkan tentang peristiwa yang penting dalam sejarah Islam iaitu hijrah Rasulullah ﷺ dari Mekah ke Madinah. Peristiwa ini telah membuka suatu lembaran baharu bagi umat Islam dalam membina sebuah negara yang berdaulat dan mempunyai peradaban yang unggul. Peristiwa hijrah ini disebut oleh Allah ﷻ melalui firman-Nya dalam surah At-Taubah ayat 40 yang bermaksud:

“Jikalau kamu tidak menolongnya (Muhammad), maka sesungguhnya Allah telah pun menolongnya, iaitu ketika orang kafir (di Mekah) mengusirnya keluar (dari negerinya Mekah), sewaktu dia menjadi salah seorang daripada dua orang (sahabat) semasa berlindung di dalam gua, ketika dia berkata kepada sahabatnya, "Janganlah kamu berdukacita. Sesungguhnya Allah bersama-sama kita." Maka Allah menurunkan perasaan tenang tenteram kepadanya (Muhammad) dan membantunya dengan bala tentera (Malaikat) yang tidak dapat kamu lihat. Allah menjadikan seruan (syirik) orang kafir itu terkebawah (kalah dengan sehina-hinanya) dan menjadikan kalimah Allah (Islam) itulah yang tertinggi (selama-lamanya) kerana Allah Maha Perkasa lagi Maha Bijaksana." ”

Hijrah ke Madinah bukanlah berlaku dengan kehendak Nabi Muhammad ﷺ tetapi ia adalah merupakan arahan dan wahyu daripada Allah ﷻ. Dalam sebuah hadis yang diriwayatkan oleh Imam Al-Bukhari bahawa Ibnu Abbas رضى الله عنه telah mengatakan yang bermaksud:

“Nabi ﷺ dilantik menjadi Rasul pada usia 40 tahun dan Baginda tinggal di Mekah selama 13 tahun (dalam menyampaikan dakwah-Nya). Kemudian, Baginda menerima wahyu daripada Allah ﷻ dan diperintahkan agar berhijrah. Maka Baginda ﷺ berhijrah dan menetap di sana selama 10 tahun kemudian Baginda wafat ketika berusia 63 tahun.”

MUSLIMIN RAHIMAKUMULLAH,

Hakikat hijrah adalah proses peralihan kepada sesuatu yang lebih baik. Ia merangkumi perubahan jiwa menjadi manusia yang baik dan soleh serta meninggalkan perkara dosa dan maksiat. Antara hikmah hijrah adalah untuk memperkukuh ketaatan dan melepaskan diri manusia daripada sebarang pengaruh jahat yang memberi kesan kepada jiwa seorang manusia sehingga menyebabkan terjerumus ke dalam kancah dosa. Seperti yang diungkapkan oleh Baginda ﷺ:

...وَالْمُهَاجِرُ مَنْ هَجَرَ مَا نَهَى اللَّهُ عَنْهُ

Maksudnya: *“Dan orang yang berhijrah itu adalah orang yang berhijrah (menjauhkan diri) daripada melakukan apa yang Allah larang.”*

﴿Hadis Riwayat Al-Bukhari﴾

Antara sifat yang perlu ada dalam proses perubahan ke arah yang lebih baik adalah istiqamah. Imam an-Nawawi رَحْمَةُ اللَّهِ عَلَيْهِ menyebutkan bahawa sentiasa berada di dalam ketaatan kepada Allah سُبْحَانَهُ وَتَعَالَى. Firman Allah dalam surah Fussilat ayat 6:

قُلْ إِنَّمَا أَنَا بَشَرٌ مِّثْلُكُمْ يُوحَىٰ إِلَيَّ أَنَّمَا إِلَهُكُمُ إِلَهُ وَاحِدٌ فَاستَقِيمُوا إِلَيْهِ وَاسْتَغْفِرُوا
وَوَيْلٌ لِّلْمُشْرِكِينَ ۝

Maksudnya: “Katakanlah (wahai Muhammad): Sesungguhnya aku hanya manusia biasa seperti kamu yang diwahyukan kepadaku bahawa Tuhan kamu ialah Tuhan Yang Maha Esa; oleh itu hendaklah kamu tetap istiqamah di atas jalan yang lurus dan beristighfarlah kepada-Nya. Dan kecelakaan besar bagi orang yang mempersekutukan-Nya.”

SIDANG JUMAAT TETAMU ALLAH سُبْحَانَهُ وَتَعَالَى SEKALIAN,

Timbul persoalan bagaimanakah cara untuk istiqamah dalam membuat perubahan diri kepada yang lebih baik? Untuk itu, beberapa panduan boleh diamalkan untuk kekal istiqamah.

Pertama: Sentiasa memperbaharui niat dengan ikhlas kerana Allah dalam setiap amalan baik yang dilakukan. Niat yang ikhlas akan mendorong untuk terus istiqamah merubah diri ke arah yang lebih baik.

Kedua: Berdoa dengan penuh pengharapan kepada Allah agar ditetapkan hati untuk terus beramal. Antara doa yang boleh dilazimi adalah doa daripada surah Ali Imran ayat 8:

رَبَّنَا لَا تُزِغْ قُلُوبَنَا بَعْدَ إِذْ هَدَيْتَنَا وَهَبْ لَنَا مِنْ لَدُنْكَ رَحْمَةً إِنَّكَ أَنْتَ الْوَهَّابُ ﴿٨﴾

Maksudnya: “(Mereka berdoa dengan berkata): Wahai Tuhan kami! Janganlah Engkau memesongkan hati kami sesudah Engkau beri petunjuk kepada kami, dan kurniakanlah kepada kami limpah rahmat dari sisi-Mu; sesungguhnya Engkau jualah Tuhan yang melimpah-limpah pemberian-Nya”.

Ketiga: Berusaha untuk melaksanakan amal kebaikan secara berperingkat dan mengikut kemampuan. Amalan yang paling dicintai oleh Allah ialah amalan yang dilakukan secara berterusan walaupun sedikit. Daripada A'isyah رَضِيَ اللَّهُ عَنْهَا, sabda Rasulullah صَلَّى اللَّهُ عَلَيْهِ وَسَلَّمَ:

أَحَبُّ الْأَعْمَالِ إِلَى اللَّهِ تَعَالَى أَدْوَمُهَا وَإِنْ قَلَّ

Maksudnya: “Amalan yang paling dicintai oleh Allah سُبْحَانَهُ وَتَعَالَى ialah amalan yang dilakukan berterusan walaupun sedikit.”

﴿Hadis Riwayat Al-Bukhari﴾

Keempat: Memilih teman yang suka melakukan kebaikan dan boleh saling nasihat menasihati antara satu sama lain. Sahabat yang baik adalah

seumpama penjual minyak wangi yang kita akan mendapat tempias wangian walaupun kita tidak membeli minyak wangi tersebut.

MUSLIMIN YANG DIRAHMATI ALLAH SEKALIAN,

Sebagai kesimpulan, hijrah yang sebenar adalah kita berusaha sedaya upaya untuk melakukan perubahan diri ke arah yang lebih baik. Hasil daripada perubahan ini akan melahirkan sebuah masyarakat yang kuat, maju dan unggul seperti masyarakat di Madinah pasca hijrah Rasulullah ﷺ.

Oleh yang demikian, marilah berhijrah dan istiqamah untuk mengubah diri daripada yang kurang baik kepada yang lebih baik. Moga berjaya menggapai redha Ilahi, bahagia duniawi dan ukhrawi.

Firman Allah dalam surah Hud ayat 112:

فَأَسْتَقِمْ كَمَا أُمِرْتَ وَمَنْ تَابَ مَعَكَ وَلَا تَطْغَوْا إِنَّهُ بِمَا تَعْمَلُونَ بَصِيرٌ ﴿١١٢﴾

Maksudnya: “Oleh itu, maka tetap teguhlah kamu (wahai Muhammad) pada jalan yang benar, sebagaimana yang diperintahkan kepadamu dan hendaklah orang yang kembali kepada kebenaran mengikutmu berbuat demikian dan janganlah kamu melampaui batas. Sesungguhnya Allah Maha Melihat apa saja yang kamu lakukan.”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهَدْيِ سَيِّدِ الْمُرْسَلِينَ، أَقُولُ مَا
سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ، إِنَّهُ
هُوَ الْغَفُورُ الرَّحِيمُ.



Khutbah Kedua Bulan Julai

(Bagi Bacaan pada 11 Ogos 2023 bertemakan “Perpaduan”)

2023M/ 14445H

الْحَمْدُ لِلَّهِ عَلَى آلَائِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعَظِيمًا لِحُجَّتِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِنَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ وَمَرْضَاتِهِ،
ثُمَّ اْعَلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرِ بَدَأَ فِيهِ بِنَفْسِهِ؛ فَقَالَ عَلِيمًا حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

[الأحزاب: 56]

اللَّهُمَّ صَلِّ وَسَلَّم عَلَى عَبْدِكَ وَرَسُولِكَ مُحَمَّدٍ نَبِيِّ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ إِلَى
يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

SIDANG JUMAAT YANG BERBAHAGIA,

Di kesempatan ini, khatib ingin berpesan kepada para hadirin berkaitan kepentingan perpaduan sebagai salah satu tunjang yang menyumbang kepada kesejahteraan dan keharmonian hidup. Melalui



perpaduan, umat dapat bersatu tenaga dan fikiran bagi melaksanakan sesuatu perkara untuk kebajikan bersama serta mampu menghasilkan kejayaan yang luar biasa.

Namun kebelakangan ini, terdapat segelintir masyarakat yang begitu teruja mengeluarkan kenyataan tanpa tapisan melalui media-media sosial sehingga mendorong tindakan luar batasan moral dan syariat. Api kebencian dan ekstrim dalam beragama disebarkan sehingga kadangkala melahirkan fitnah yang tidak terkawal dan meresahkan umat. Allah ﷻ telah berfirman di dalam Surah al-Nur ayat ke-19 yang bermaksud:

“Sesungguhnya orang yang ingin agar perbuatan yang sangat keji itu (berita bohong) tersebar dalam kalangan orang beriman, mereka mendapat azab yang pedih di dunia dan di akhirat. Ingatlah Allah Maha Mengetahui (segala perkara) sedangkan kamu tidak mengetahui (yang demikian).

Perbuatan fitnah ini juga dikecam dengan keras oleh Baginda Nabi ﷺ dalam hadith yang diriwayatkan oleh Huzaifah رَضِيَ اللَّهُ عَنْهُ:

لَا يَدْخُلُ الْجَنَّةَ نَمَّامٌ

Maksudnya: “Tidak masuk syurga orang yang menyebarkan fitnah (mengadu domba).” **[Hadis Riwayat al-Bukhari dan Muslim]**

Malaysia adalah negara yang mempunyai kedaulatan yang perlu dipertahankan demi generasi masa depan. Usahlah dibiarkan maruah negara kita dicemari apatah lagi tergadai angkara konflik sesama kita sehingga boleh mengundang campur tangan kuasa asing. Amat

dibimbangi kesilapan sejarah silam berulang kembali. Justeru mimbar ingin menegaskan kepada jemaah sekalian bahawa perbuatan fitnah dan sebarang usaha untuk menghancurkan perpaduan merupakan perbuatan khianat terhadap agama dan terpesong daripada ajaran Rasulullah. Ayuh kita jauhi dosa ini, hentikan kezaliman dan bersama berusaha memelihara keharmonian negara dan ummah.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،
اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَائِنَا وَوُلَاةَ أُمُورِنَا.

اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah dan Kebawah Duli Yang Maha Mulia Seri Paduka Baginda Raja Permaisuri Agong, Tunku Azizah Aminah Maimunah Iskandariah Binti Almarhum Al-Mutawakkil Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ اذْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالرَّنَا وَالزَّلَازِلَ وَالْمِحْنَ وَسُوءَ
الْفِتَنِ مَا ظَهَرَ مِنْهَا وَمَا بَطَنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً
يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٠﴾ فَادْكُرُوا اللَّهَ الْجَلِيلَ يَذْكُرْكُمْ، وَاشْكُرُوهُ
عَلَىٰ نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿١٥﴾